

華嚴經普賢行願品疏鈔擷

普賢行願品別行疏鈔擷

普賢行願品疏鈔擷重刻序

淨土法門，其大無外。一切諸佛，及諸佛阿耨多羅三藐三菩提法，皆從此出。一切菩薩，及菩薩上求下化稱性所修之道，皆從此入。所謂無不從此法界流，無不還歸此法界也。夫如來為一大事因緣，出現於世，雖隨機設教，種種不一。求其若聖若凡，上中下根，乃至逆惡之流，同於現生了生脫死，俯謝三界，高登九品者，唯淨土一門為然也。噫。如來大慈，普度眾生。唯此一法，堪暢本懷。眾生修行，冀出生死，唯此一法，決遂所願。法門廣大，利益宏深。固宜一切佛子，悉皆奉行。何近見愚夫愚婦，率多竭誠歸命。而通宗通教之士，反漠然置之，若不聞知者然。其故何在。以研教者按常途教理以論斷證，不信有帶業往生之事。矜常處生死以度眾生，不願為速出生死之人。不知坯器未燒，經雨即化。煩惱未斷，轉生即迷。自利尚難，焉能利他。此皆不諒己德，以博地凡夫，稍具慧性，便以法身大士之作略自擬，以致一誤永誤也。參宗者專主參究，以期明心見性。不知其機稍劣，不能明心見性者多多也。即使已得明心見性，而惑業未斷，仍舊輪迴生死，不能出離者，又多多也。五祖戒、草堂清、海印信、真如喆等，乃其確證。噫。死生亦大矣，何可以專仗自力而不仗佛力耶。抑或自力果愈於佛力耶。夫人之處世，大而創業垂統，小一衣一食，莫不仗眾人之力，以成自事。至於了生死大事，乃雖有佛力而不肯倚仗。欲顯出格之作略，恐墮愚夫之窠臼。其志可謂大矣，惜乎不知其所謂大也。不觀華嚴一經，王於三藏。乃如來初成正覺，為界外四十一位法身大士，所說一生成佛之法。其一生成佛之歸宗結頂究竟實義，在於以十大願王，迴向往生西方極樂世界，以期圓滿佛果。夫善財所證，已得與普賢等，與諸佛等，所謂等覺菩薩也。等覺去佛，特一閒耳，尚須迴向往生。舉華藏世界海諸菩薩，同稟此教，同修此法。豈今之通宗通教者，其根性之利，證入之深，悉能超過此等菩薩乎。千經萬論，處處指歸。往聖前賢，人人趣向。豈此諸經論，皆不足遵依。此諸聖賢，皆愚夫愚婦耶。一言以蔽之，曰，業深障重，未應解脫。故致日用不知，習矣不察而已。普賢行願品者，即八十卷華嚴經末後之入法界品，善財徧參五十三員知識，至普賢所，承普賢開示，及威神之力，即證等覺。普賢乃為說偈，

稱讚如來勝妙功德。以文來未盡，故未結而終。清涼國師特著疏鈔，以大宏其道。至德宗貞元間。南印度烏荼國王，方貢普賢行願品之梵本全文，譯成四十卷。前之三十九卷，即八十華嚴經之入法界品，而文義加詳。第四十一卷，乃現所流通之普賢行願品也。時清涼亦預譯場，極為讚揚，奉命撰疏。四十卷之全疏，中國久已失傳。幸東洋藏中，尚有其書。北京刻經處，專刻古德佚書，不久當可流通也。此一卷經，又復重為別行疏，以備樂簡略，及修淨土者之研窮。其徒圭峯，為之造鈔，固已中外流通矣。但以文富義繁，不便初機。范古農居士，以世以淨土三經並行願品一卷，為淨土四經。三經註者頗多，不妨隨機取閱。此經唯有疏鈔，雖發揮盡致，而初機每多茫然。遂即疏鈔，擷其要義，刊板流通。文雖簡略，義仍具足，可謂觀機逗教。有益法門，殊非淺鮮。學者果能先閱擷本，後讀全文，不但清涼宏讚之心，可以悉知。而普賢勸發，如來出世之心，亦可以悉知矣。敢請通宗通教之士，共隨華藏海會諸菩薩，及諸愚夫愚婦之班，一致進行，同往西方。庶可不孤佛化，不負己靈也已。

民國十一年壬戌佛誕日常慚愧僧印光釋聖量撰

普賢行願品疏鈔擷緣起


庚申歲初，與武林諸佛友，讚揚淨土，師法靈峯，以願行為信行之中樞，往生之先導；彌陀華嚴，實相表裏，庶幾妙契佛心，遠離戲論乎！爾時靈璧程中和居士發心印施普賢行願品經，幻修以其深會悉檀因緣，歡忻讚歎。定慧弘一上人座曰：安得如彌陀疏鈔擷，將行願品疏鈔，擷其精華，以餉初學乎？幻修對曰：夙有斯願，未遑從事；今蒙付屬，其勉為之。逮乎返里，乃於課學餘暉，玩讀疏鈔，擷採要義，會錄於經，得二萬餘言。知淵文幽旨，疏漏實多，豈敢比美於先賢，聊以塞上人之責而已。雖然世有心嚮淨土者，苟因斯編而發心誦斯品也，則所以成就其往生者，可操左卷，是又幻修之所竊幸也。夫稿成因記其緣起如此。

釋尊應世二千九百四十七年庚申仲夏

菩薩優婆塞弟子幻修和南謹識

普賢行願品略科

準《清涼疏》



普賢行願品別行疏鈔擷

大方廣佛華嚴經入不思議解脫境界普賢行願品

初七字為經題。大。常徧義。言體也。方。軌持義。言相也。廣。包博義。言用也。大方廣者。所證之法也。佛。覺照義。出果也。華。感果嚴身義。喻因也。嚴。資莊義。因為能嚴。果為所嚴。因果之總相也。佛華嚴者。能證之人也。此六字為所詮。經者。攝持之義。為能詮。次為品名。心智契合為入。心言不及為不思議。作用離障為解脫。智造分域為境界。不思議解脫境界。即所入也。德周善順。為普賢。造修悌求。為行願。亦是普賢菩薩之行願。為能人也。品。是一類之義。經中目也。

然此一品。即是華嚴經第一第二譯本之入法界品。（第一本晉譯。有十四卷。第二本唐譯。有二十一卷。）梵本為南天竺烏荼國王吉祥自在所進。唐德宗貞元十二年詔譯為四十卷。是為華嚴經之第三譯。

別行一卷。

此品全經有四十卷。最後一卷。略出弘宣。故曰別行。蓋以此卷為華嚴關鍵。修行樞機。文約義豐。功高益廣。能簡能易。唯遠唯深。可讚可傳。可行可寶。

唐罽賓三藏般若奉詔譯

罽賓。即北天竺界羯溼彌羅國之別名。此翻賤種。三藏者。譯經師之通號。言其能解經律論三藏也。般若此云智慧。即具云金剛智慧。師之名也。師自唐代宗朝。來至中國。梵策即至。詔令在京師之大崇福寺翻譯。此經自貞元十二年之六月始譯。至十四年之二月譯成。

唐大崇福寺沙門澄觀疏

唐家起自太原。以報地恩。造五所寺。總名太原寺。後因天后重修。改名崇福。此為古西太原寺也。沙門。此云勤息。謂勤修戒定慧。息滅貪瞋癡。出家人之通號也。澄觀。為此經之疏主。字大休。號清涼國師。師即疏全經。又將此一卷疏而別行之。

唐圭峯草堂寺沙門宗密鈔

圭峯。在終南山。宗密。師之號。此師誕生於唐德宗初年。入滅於武宗初年。承清涼法脈。故就清涼疏而鈔集諸義以釋之也。

右釋題竟。

此經以入法界緣起普賢行願為宗。法界緣起即所入也。普賢行願為能入也。入通能所。法界者。謂寂寥虛曠。沖深包博。總該萬有。即是一心。體絕有無。相非生滅。莫尋其始。寧見中邊。諸佛證此。為物開示。不知何以名目。強分理事二門。曰事法界。理法界。而理事渾融無有障礙。故又總為無障礙法界。普賢行願者。略有二種。一者身入。二者心入。身由心證。故辨心入。心入有三。一者正信。二者正解。三者正行。此三無礙。能所契合。正顯入義。入者了達證悟之名。略有二門。一者果海。離於說相。二者因門。可寄言說。謂以無分別智證理法界。則有能所歷然。能所無二。能所俱泯。及存亡無礙。舉一全收之五門。若以無障礙智證無障礙境。則境智圓融。難可言盡。總為能所契合。三者一揆。是為入法界緣起普賢行願為宗也。

右辨宗竟。

此經既屬別行。故無證信序。而但有發起序。證信序在四十卷經中第一卷。如是我聞。一時佛在室羅筏城逝多林給孤獨園與菩薩摩訶薩五千人俱云云。發起序。即此經初至不可窮盡文也。第二若欲成就此功德下。為正宗分。第三爾時世尊與諸聖者菩薩摩訶薩演說如是不可思議解脫境界勝法門時下。為流通分。

右判分竟。

以下隨文解釋。即略疏科判以為段落。

甲一序分

指前所嘆如來殊勝果德說無窮盡。生起意勢。云修何因行。證得如斯之果。便說普賢行願。示以普因。為正宗也。故以結前已說而為序分。

爾時普賢菩薩摩訶薩。稱歎如來勝功德已。

此結前廣偈。標能讚人。及所作業也。凡是修行菩提行者通名菩薩。菩謂

菩提。即所求也。薩謂薩埵。此云有情。即所度也。又菩提名智。薩埵云勇。是人為求菩提智故。發生大勇猛心。摩訶薩者。大有情也。地上菩薩皆得此名。普賢為別名。然菩薩名普賢者有三位。一為地前資糧加行二位菩薩。以曲濟無遺曰普。鄰極亞聖曰賢。二為地上菩薩。以德周法界曰普。至順調善曰賢。三為得果不捨因門之菩薩。謂已成佛竟。隱實現權。示居因位。以果無不極曰普。不捨因門曰賢。今文普賢。即此第三位也。如來者。佛十號之首。照而恆寂曰如。寂而常照曰來。此指華嚴教主毗盧遮那佛也。稱歎勝功德已者。指前第三十九品半卷經。廣以偈讚佛德。末後結云。剎塵心念可數知。大海中水可飲盡。虛空可量風可繫。無能說盡佛功德。若有聞斯功德海。能生歡喜信解心。如所稱揚悉當獲。慎勿於此懷疑念。（說盡：經文為盡說。）

告諸菩薩。及善財言。善男子。如來功德。假使十方一切諸佛。經不可說不可說佛剎極微塵數劫。相續演說。不可窮盡。

此結說不盡也。善財者菩薩之名。此菩薩初入胎時。宅內自然而出七寶樓閣。下有伏藏。上生七寶芽。及誕生。伏藏忽開。光明照耀。復於宅中。有五百寶器。珍奇盈滿。自然出現。復於宅中。徧雨種種珍寶財物。及諸資具。一切庫藏。悉皆充滿。以此事故。名曰善財。於福城東。古佛廟前。參禮文殊。最後參見普賢。即菩提場如來會中。為說顯因廣大相也。不可說不可說者。大數之名。經明十萬為一洛叉。百洛叉為一俱胝。俱胝俱胝為一阿庾多。此下倍倍數至第一百二十三名即是。理實但是超過言說之數也。佛剎。謂大千世界也。碎佛剎為極微塵數之至多也。劫。梵云劫波。此云分別時分。久暫不定。今舉大數。但是多時。前讚偈云。無能盡說佛功德者。猶是一因人一時所說。今明果佛。且數有總包十方一切之多。時歷剎塵長久之劫。相續無間。說亦不盡。不思議玄妙極矣。

甲二正宗分

廣說能證普賢行願。令入法界。則成如來勝功德也。有二。

乙一正陳所說二。乙二結說讚善。

丙一長行。丙二偈頌。

丁一正示普因三。丁二顯經勝德。丁三結勸受持。

戊一標列應修。戊二牒名別釋。戊三結益令知。

今戊一。

若欲成就此功德門。應修十種廣大行願。何等為十？一者禮敬諸佛。二者稱讚如來。三者廣修供養。四者懺除業障。五者隨喜功德。六者請轉法輪。七者請佛住世。八者常隨佛學。九者恆順眾生。十者普皆回向。

具十以表無盡。六七二事俱是勸請。八九二事回向開出。餘至文顯。

戊二牒名別釋分二：己一總釋。己二別釋。

今己一。（釋：應為徵）

善財白言。大聖。云何禮敬。乃至回向。

己二別釋分十：庚一禮敬諸佛。庚二稱讚如來。庚三廣修供養。庚四懺除業障。庚五隨喜功德。庚六請轉法輪。庚七請佛住世。庚八常隨佛學。庚九恆順眾生。庚十普皆回向。

今庚一。

普賢菩薩告善財言。善男子。言禮敬諸佛者。

由心恭敬。運於身口。而徧禮故。除我慢障。起敬信善。禮敬者。先須五輪著地。捧足殷重。深入法性。離能所相。普運身心。禮不可禮。但禮內佛。不向外求。若內若外。同一實相。隨一一禮。普代眾生。入帝網境。若佛若禮。重重無盡。方是普賢行願也。此牒名。下釋相也。

所有盡法界虛空界。十方三世一切佛刹。極微塵數諸佛世尊。

謂橫豎普周。盡帝網境。標所禮也。具如稱讚供養門。

我以普賢行願力故。深信解。如對目前。

能禮之因有二。一依法力。謂以普賢願力。見一切境皆是諸佛。為所緣也。二依自力。謂以深信解之智。決定印可。攝持如上佛境令現在前也。大經云。一切法無生。一切法無滅。若能如是解。諸佛常現前。

悉以清淨身語意業。常修禮敬。

下明能禮相。悉者。皆也咸也盡也。以者。用也。清淨三業。謂身無三惡。口離四過。意三業淨也。由染業故。惡道輪回。今成佛因。須憑淨業也。三業敬者。為顯佛有天眼通故。以身業敬。顯佛有天耳通故。以語業敬。顯佛有他心通故。以意業敬。又為感得佛之三輪故。身感神通輪。語感教誡輪。意感記心輪。此總明。下乃別顯。

一一佛所。皆現不可說不可說佛剎極微塵數身。一一身。禮不可說不可說佛剎極微塵數佛。

謂依前二力。故得於境能見多佛。於自能現多身。乍觀經文。若以一一佛所皆現多身。則似身多佛少。若以一一自身皆禮多佛。則似身少佛多。據其義理。身佛齊等。經文欲明一多無礙。故於身佛互舉一多。又佛前本有多身。身前本有多佛。但以執境迷心。致令都不見耳。佛以善覺三昧而現之。是果門入。今以普賢觀行而見之。是因門入。因果之相雖異。所入之境無差。故得因該果海。果徹因源也。

虛空界盡。我禮乃盡。以虛空界不可盡故。我此禮敬無有窮盡。如是乃至眾生界盡。眾生業盡。眾生煩惱盡。我禮乃盡。而眾生界乃至煩惱無有盡故。我此禮敬無有窮盡。

此顯無盡也。準十地經有十無盡界。今經是觀能趣入行願。故略餘八。但明眾生及虛空界。又以觀行是對治門故。於眾生中開出業惑。眾生無盡。一一眾生有多業惑。彌顯無盡。

念念相續。無有間斷。身語意業。無有疲厭。

此彰無間也。疲謂疲倦。厭謂厭足。若不以普賢觀行之力。如何得念念不斷。願智者審思此文。無以生滅之心。取相之禮。而為禮。亦無以生滅取相之讚歎供養。乃至回向等。而為普賢行願也。

庚二稱讚如來。

復次善男子。言稱讚如來者。

二、稱讚如來

稱謂稱述。讚即讚揚。稱述聖德。讚揚其美也。又謂稱揚讚歎。如來者。於十號中。即倣同先跡號。金剛經云。如來者。即諸法如義。又云。無所從來。亦無所去。故名如來。涅槃經云。如過去佛所說不變。從六波羅蜜來。至大涅槃。故名如來。成實論云。乘如實道。來成正覺。故名如來。此牒名。下釋相也。

所有盡法界虛空界。十方三世一切剎土。所有極微一一塵中。皆有一切世間極微塵數佛。一一佛所。皆有菩薩海會圍繞。

此所讚境。三重無盡也。

我當悉以甚深勝解現前知見。

此能讚因。言悉以。即法力亦含在其中。

各以出過辯才天女微妙舌根。一一舌根。出無盡音聲海。一一音聲海。出一切言辭海。稱揚讚歎一切如來諸功德海。窮未來際。相續不斷。盡於法界。無不周徧。

此能讚相也。天女有大功德。能滿眾願。能施辯才。彼有佛辯。無更勝者。此是普賢方便。令修行者起最勝意樂。作其觀想。生不足之心。故言出過。或彼有佛辯。佛辯即合法界。法界即是無盡。不可超過。今以勝解力故。所出音聲合法界。故言出過也。辯才者。總有四種。一法無礙解。於一切法無不通達故。二義無礙解。於所詮道理無壅塞故。三詞無礙解。以智慧力。普應一切眾生心行差別。四辯說無礙解。此復有七。一應辯。二捷辯。三峻辯。四無疏謬辯。五無斷盡辯。六豐義味辯。七一切世間最上妙辯更無過者。此四辯。第九地菩薩方具得之。若窮理盡相。朗照無遺者。佛及普賢而已。微妙舌根者。如大經說菩薩摩訶薩有十種舌。所謂開示演說無盡眾生行舌。開示演說無盡法門舌。讚歎諸佛無盡功德舌。演暢詞辯無盡舌。開闡大乘助道舌。覆十方虛空舌。普照一切佛剎舌。普使眾生悟解舌。悉令諸佛歡喜舌。降伏一切諸魔外道。除滅一切生死煩惱令到涅槃舌也。

如是虛空界盡。眾生界盡。眾生業盡。眾生煩惱盡。我讚乃盡。而虛空界

乃至煩惱無有盡故。我此讚歎無有窮盡。念念相續。無有間斷。身語意業。無有疲厭。

此總結無盡也。文少略前。若具說者。皆如上節。

庚三廣修供養。

復次善男子。言廣修供養者。

此牒名。下釋相。

所有盡法界虛空界。十方三世一切佛刹極微塵中。一一各有一切世界極微塵數佛。一一佛所。種種菩薩海會圍繞。

此所供境也。

我以普賢行願力故。起深信解。現前知見。

此能供因也。

悉以上妙諸供養具而為供養。所謂華雲。鬘雲。天音樂雲。天傘蓋雲。天衣服雲。天種種香。塗香燒香末香。如是等雲。一一量如須彌山王。然種種燈。酥燈油燈。諸香油燈。一一燈炷如須彌山。一一燈油如大海水。

此列供具也。天者。自然義。表法界中法爾自然。有如是不思議德用也。雲者。隨緣義。表由行願力故。法如是故也。謂此供具。色相顯然。智鑒無性。從法性空無生法起。能現所現。迴無所依。應用而來。來無所從。用謝而去。去無所至。而能含悲潤。注法雨。益濟萬物。重重無盡。故有雲像焉。種種香者。謂沈檀薝蔔龍腦鬱金。及諸華香等。塗香者。謂和合諸香。用塗身手。須彌山者。取人間目覩。高大無過。又四寶所成。而具十德。表供具一一具德相妙用也。言如大海水者。表供養稱理故深。稱事故廣。故喻之如海也。菩薩修行如是供養之時。不礙上供養諸佛。熾然下濟含識。先作是念。無邊有情。漂淪六趣。由自心虛妄。感種種果報。內懷佛性。而不自知。實可愍傷。云何當救。即作自念。由我獻華等。得佛勝福慧。願回此功德。令一切安樂。

以如是等諸供養具。常為供養。

此正明供養也。一香一華。皆以稱理成就。即一之多。修行者。但安心觀

行。物物自多。皆佛也。故尋常云。願此香華雲。徧滿十方界。供養一切佛。上來正明供行。下乃校量顯勝。

善男子。諸供養中。法供養最。

此總舉所校量也。

所謂如說修行供養。

下別明也。智度論云。能行說為正。不行何所說。若說不修行。不名為智者。文殊章云。如來從修行中來。若能修行。是則成就供養如來。

利益眾生供養。

如十地品云。所修善根。皆為救護一切眾生。又云。諸佛出世。本為利樂一切眾生故。所以利益名真供養。

攝受眾生供養。

以慈悲心。隨順攝取。言供養者。諸佛出世。為以慈悲攝眾生故。菩薩普門示現。皆為攝取眾生。安置佛道也。

代眾生苦供養。

以代眾生。上契佛意故。

勤修善根供養。不捨菩薩業供養。

若不勤修一切善法。是亦不能利樂一切眾生。若捨菩薩所修事業亦然。

不離菩提心供養。

捨菩提心。凡所修善。魔所攝持。

善男子。如前供養無量功德。比法供養一念功德。百分不及一。千分不及一。百千俱胝那由他分。迦羅分。算分。數分。喻分。優波尼沙陀分。亦不及一。

據梵本意。上來觀行。名最勝善根。及法供養。此二類。一念善根是所校量。過去供養為能校量。以未修普賢行願供養。不及今修普賢觀行供養故。是財施若能稱法。皆法供養。況於深觀。非以後抑前也。言迦羅者。此云豎折人

身一毛以為百分也。言優波尼沙陀者。此云近少。亦云近對。謂少分相近比對之分。

何以故。以諸如來尊重法故。以如說行。出生諸佛故。若諸菩薩行法供養。則得成就供養如來。如是修行。是真供養故。

此徵釋校量不及所以也。

此廣大最勝供養。虛空界盡。眾生界盡。眾生業盡。眾生煩惱盡。我供乃盡。而虛空界乃至煩惱不可盡故。我此供養亦無有盡。念念相續。無有間斷。身語意業。無有疲厭。

此最勝供養。即前觀行。若此最勝不及法者。何以無盡。此總結無盡中。並同稱讚行也。

庚四懺除業障。

復次善男子。言懺除業障者。

懺者。梵音具云懺摩。此云悔過。若別說者。懺為陳露先罪。悔為改往修來。障有煩惱業報三者。能障聖道及人天勝事。此三者更相由藉。因煩惱故。以起惡業。惡業因緣。故得苦果。今偏言業。實兼三也。懺業有三。一伏業懺。伏令不生。二轉業懺。願於今身常不入惡道受。三滅業懺。罪如暗室。懺悔如燈。不以暗室多時能拒燈也。懺法有二。若犯遮罪。作法懺之。若犯性罪。復須起行。起行有事懺理懺之別。如普賢觀經中明。晝夜精勤禮十方佛。即是事懺。又隨好品中。觀諸業性。非十方來。止住於心。從顛倒生。無有住處。即是理懺。事懺除末。理懺拔根。若具足懺。應須善達逆順十心。謂先懺十種順生死心。以為所治。一妄計人我。起於身見。二內具煩惱。外遇惡緣。我心增盛。三內外既具。滅善心事。不喜他善。四縱恣三業。無惡不為。五事雖不廣。惡心徧布。六惡心相續。晝夜不斷。七覆諱過失。不欲人知。八虜扈抵突。不畏惡道。九無慚無愧。不懼凡聖。十撥無因果。作一闡提。從無始來。若自及他。無不皆爾。次起十種逆生死心。從後翻破。一明信因果。二自愧克責。三怖畏惡道。四不覆瑕玼。五斷相續心。六發菩提心。七修功補過。八守護正法。九念十方佛。十觀罪性空。若具此者。無罪不滅。此牒名。下釋相也。

菩薩自念。我於過去無始劫中。由貪瞋癡。發身口意。作諸惡業。

此正舉所懺也。貪等是惡業因。煩惱障也。身等是造業具。諸惡業。意兼二障。一為業障。即殺盜淫兩舌惡口妄言綺語及貪欲瞋恚邪見之十支。二為現身報。來生報。及後世報之三障也。

無量無邊。若此惡業有體相者。盡虛空界不能容受。

此顯其廣多也。以無形故。不見相貌。有則溢空。即通說順流十心。

我今悉以清淨三業。

明懺業具。昔因三業無惡不為。今以三業。一時齊懺。謂虔恭胡跪。口陳辭句。

徧於法界。極微塵刹。一切諸佛菩薩眾前。誠心懺悔。後不復造。恆住淨戒一切功德。

此明所對境。徧有二意。一即翻惡心徧布。二為稱法性故。無罪不除。佛菩薩眾。即念十方佛。翻昔惡友也。誠心。簡不至心。緩縱情慮。罪不滅故。懺悔即含自愧克責。怖畏惡道。不覆瑕玼也。後不復造。即斷相續心也。恆住淨戒。即修功補過也。總此懺以明識因果。善惡影響。故亦即守護正法也。此中略發菩提心。及觀罪性空二者。以修此行願。必先已發菩提心。而此行願。又即是無性之緣起故也。

如是虛空界盡。眾生界盡。眾生業盡。眾生煩惱盡。我懺乃盡。而虛空界乃至眾生煩惱不可盡故。我此懺悔無有窮盡。念念相續。無有間斷。身語意業。無有疲厭。

此總結無盡。

庚五隨喜功德。

復次善男子。言隨喜功德者。

隨所見善而歡喜。是懺悔中別義。除嫉妒障。起平等善。此牒名。下釋相。

所有盡法界虛空界。十方三世一切佛刹。極微塵數諸佛如來。從初發心。

為一切智。勤修福聚。不惜身命。經不可說不可說佛剎極微塵數劫。一一劫中。捨不可說不可說佛剎極微塵數頭目手足。如是一切難行苦行。圓滿種種波羅密門。證入種種菩薩智地。成就諸佛無上菩提。及般涅槃。分布舍利。所有善根。我皆隨喜。

此隨喜如來善也。難行苦行。如心地觀經說。佛為凡夫時。作雪山童子。為求半偈。棄捨全身。薩埵王子捨身救虎。為六牙象王。自投獵者。作圓滿福智王施眼睛。為金色鹿王捨身求道。作慈力王施五夜叉。作莊嚴王施妻無吝。為最上身菩薩施頭目髓腦等。種種智地。即十地也。般涅槃。譯云入滅。有四義。此指應滅也。分佈舍利。如西域記說。佛入滅後。三分舍利。諸天龍王人間各得其一。建塔供養。

及彼十方一切世界。六趣四生一切種類。所有功德。乃至一塵。我皆隨喜。

此喜諸趣善。六趣者。一地獄。二畜生。三餓鬼。四修羅。五人。六天。謂求生者所趣向處也。四生者。胎卵濕化。眾生受生之相也。

十方三世一切聲聞。及辟支佛有學無學。所有功德。我皆隨喜。

此喜二乘善。聲聞者。因聞聲教。悟四諦理。證學無學果。辟支佛。此云獨覺。亦名緣覺。從緣覺故。二乘與佛。同證解脫。有大功德。能與眾生作大福田。故令隨喜。

一切菩薩所修無量難行苦行。志求無上正等菩提。廣大功德。我皆隨喜。

此喜菩薩善。諸善佛為最勝。所以先明。餘三類。從劣向勝。

如是虛空界盡。眾生界盡。眾生業盡。眾生煩惱盡。我此隨喜無有窮盡。念念相續。無有間斷。身語意業無有疲厭。

此總結無盡也。

庚六請轉法輪

復次善男子。言請轉法輪者。

菩薩愍眾。故須勸請。除謗法障。起慈善根。轉法輪者。法。軌持義。通教理行果。輪。所成義。大小乘別。而通以八聖道為體。輪義有四。一圓滿義。

具轂輻輳（正見正思惟為轂。正語正業正命為輻。正念正定正精進為輳）故。二摧壞義。聖道現前。能摧煩惱。三鎮遏義。更作觀行。鎮伏煩惱也。四不定義。即從見道入修道。修道入無學。自既證已。度他亦證也。轉。即展轉傳授義。謂過去佛。傳至現在未來佛也。此牒名。下釋相。

所有盡法界虛空界。十方三世一切佛刹極微塵中。一一各有不可說不可說佛刹極微塵數廣大佛刹。一一刹中念念有不可說不可說佛刹極微塵數一切諸佛成等正覺。一切菩薩海會圍繞。

此舉所請境。先標所徧處。後舉所請人。言念念有不可說等者。意在境寬。能請無邊故。一念尚然。況經多劫。

而我悉以身口意業種種方便。殷勤勸請。轉妙法輪。

此正明請法。言種種方便殷勤勸請者。如我釋迦世尊初成正覺。梵釋天眾三四說偈。請佛說法是也。勸請。有隨緣請。稱性請。隨緣請可知。稱性請者。須恆悟一切聲如空谷響。緣起無性。非斷非常。一一全真。無非法界。既聞無所聞。即終日聞法。心觀如此。是請轉法輪也。

如是虛空界盡。眾生界盡。眾生業盡。眾生煩惱盡。我常勸請一切諸佛轉正法輪無有窮盡。念念相續。無有間斷。身語意業。無有疲厭。

此總結無盡也。

庚七請佛住世

復次善男子。言請佛住世者。

即是勸請中別義。眾生心淨。見佛常住。眾生心垢。見佛捨命。佛無生滅。隨機見殊。故知心淨觀佛。佛則常住。為真勸也。此牒名。下釋相。

所有盡法界虛空界。十方三世一切佛刹。極微塵數諸佛如來。將欲示現般涅槃者。及諸菩薩聲聞緣覺有學無學。乃至一切諸善知識。我悉勸請莫入涅槃。經於一切佛刹極微塵數劫。為欲利樂一切眾生。

涅槃具云般涅槃那。古譯云入滅。或云滅度。即滅障度苦也。滅義有四。一事滅。生死相滅也。二德滅。離性修也。三應滅。應盡還源也。四理滅。具

相空真空二義。為上三滅之本也。新云波利匿嚩喃。翻為圓寂。謂義充法界。德備塵沙。故稱圓。體窮真性。妙絕相累。故云寂。又法爾無缺故稱圓。體自真常故稱寂。此約性淨涅槃也。又萬德成滿故稱圓。眾類永寂故云寂。此約方便淨涅槃也。又化用周普故稱圓。用而常寂故云寂。此約應化涅槃也。示現者。大經云。作佛事已。觀十種義。示般涅槃。所謂示一切行實無常故。乃至示一切法無起。而有聚集散壞相故。我悉勸請等者。如涅槃經說。大覺世尊。將欲涅槃。出大音聲。徧告一切。眾生聞已。心大憂愁。到如來所。頭面禮敬。說偈勸請。復以種種譬喻。殷勤勸請。佛亦安慰。而為說法是也。聲聞緣覺。斷惑證如。益物功高。故須勸請。善知識者。如涅槃經謂佛。辟支佛。聲聞。人中信方等者。如大船師。善渡人故。故須勸請也。諸佛如來。法爾常現無盡身雲。徧說徧益。即佛本住世。故今勸請者。但依智離識。常作佛觀。心清智明。即常見佛。不曾涅槃。若暫爾起心。塵勞相續。觀智間斷。即不見佛。名佛滅度也。

如是虛空界盡。眾生界盡。眾生業盡。眾生煩惱盡。我此勸請無有窮盡。念念相續。無有間斷。身語意業。無有疲厭。

此總結無盡也。

庚八常隨佛學。

復次善男子。言常隨佛學者。

義同等一切佛回向。亦自利行。謂托佛行事。以為所緣。引得心智隨而學之。以觀智融己身心。令常在此境。勿執身心定相。致令在慳貪瞋恚六塵五欲顛倒境也。若將佛苦行境。常為心觀。則遇諸苦事。乃稱本願。而無怨惱。遇諸樂事。自無耽染。以非常時心觀所願。智者善思。勉旃而學。此牒名。下釋相。

如此娑婆世界毗盧遮那如來。從初發心。精進不退。以不可說不可說身命而為布施。剝皮為紙。析骨為筆。刺血為墨。書寫經典。積如須彌。為重法故。不惜身命。何況王位城邑聚落宮殿園林一切所有。及餘種種難行苦

行。

此舉本師之因行。娑婆世界。是華藏世界最中香水海二十重中第十三重也。意明即此穢土。眾生可以造觀修習。又佛本不離穢土修證。故略舉娑婆。而所歸之佛。便須稱實圓見。故舉光明徧照。即依正中真應影略耳。發心者。智度論云。若有人言。願我當來作佛。度脫一切眾生苦惱。是名發菩提心。經云。此發心相有其十種。一親近善友。二供養諸佛。三修習善根。四志求勝法。五心常柔和。六遭苦能忍。七慈悲深厚。八深心平等。九愛樂大乘。十求佛智慧。精進有三。一被甲。二善法。三利樂也。不退有四。信位證行也。剝皮為紙等者。有二。一隨相釋。或為緣闕。或為重法。如最勝仙人事。二觀智釋。謂觀察此身。若皮若骨。舉體全空。雖似有相。原同法界。如是推徵。三諦具足三妙觀。詮此義時。生得此解。契合圓機。便是寫經也。

乃至樹下成大菩提。示種種神通。起種種變化。現種種佛身。處種種眾會。或處一切諸大菩薩眾會道場。或處聲聞及辟支佛眾會道場。或處轉輪聖王小王眷屬眾會道場。或處剎利及婆羅門長者居士眾會道場。乃至或處天龍八部人非人等眾會道場。處於如是種種眾會。以圓滿音。如大雷震。隨其樂欲。成熟眾生。乃至示現入於涅槃。

此舉其果用也。智境無壅名通。即六通也。轉換舊質名變。無而忽有名化。即十八變也。種種佛身。即兩重十身。其融三世間十身。為眾生。國土。業報。聲聞。緣覺。菩薩。如來。法。智。虛空等身。約之不出於法報化三身也。轉輪聖王。謂金銀銅鐵四種輪王。剎利即剎帝利王種也。婆羅門。淨行也。并吠奢。商賈也。戍陀羅。農人也。為西域四種族姓。上明所學。下辨能學。

如是一切。我皆隨學。

上來明學本師也。

如今世尊毗盧遮那。如是盡法界虛空界。十方三世一切佛剎所有塵中一切如來。皆亦如是。於念念中。我皆隨學。

此例學一切也。

如是虛空界盡。眾生界盡。眾生業盡。眾生煩惱盡。我此隨學無有窮盡。念念相續。無有間斷。身語意業。無有疲厭。

此總結無盡也。

庚九恆順眾生

復次善男子。言恆順眾生者。

謂隨順眾生種類根性饒益成就。即利他行。諸佛因果之行。順於真理。故須倣學。眾生善惡之行。不離迷心。非可言學。然常以同體大悲。融通物我。故云恆順。如何順耶。謂以普賢行願力故。普見眾生。無非性之緣起。既託真性而現。故無自體。既云現也。則幻相歷然。非斷非滅。如鏡現面像。但云面無骨肉之自體。豈不現面像耶。如此普見眾生。是為恆順也。此牒名。下釋相。

謂盡法界虛空界。十方剎海。所有眾生。種種差別。

此下標所順眾也。眾生者。謂以四大五蘊十二處及十八界十二因緣等合成。假名為人。又謂有情者。數數生故。名為眾生。此總標。後別釋。

所謂：卵生胎生濕生化生。或有依於地、水、火、風而生住者，或有依空及諸卉木而生住者。種種生類。種種色身。種種形狀。種種相貌。種種壽量。種种族類。種種名號。種種心性。種種知見。種種欲樂。種種意行。種種威儀。種種衣服、種種飲食，處於種種村營、聚落、城邑、宮殿。乃至一切天龍八部人非人等。無足二足四足多足。有色無色。有想無想。非有想非無想。

卵胎濕化為四生。更加有色。都成九類。九類略有二種差別。初明四生。則依止差別。報之所託故。餘三可依。化生依何。依業染生也。餘五類則麤細差別。此明報相。下二界。有色為麤。無色為細。於有色中。有想為麤。無想為細。非有想非無想。則無色界中唯舉其細。對餘為麤。若配五道。則天及地獄化生。鬼具胎化。人畜各通於四。

如是等類。我皆於彼隨順而轉。種種承事。種種供養。如敬父母。如奉師長。及阿羅漢。乃至如來。等無有異。於諸病苦。為作良醫。於失道者。

示其正路。於暗夜中。為作光明。於貧窮者。令得伏藏。菩薩如是平等饒益一切眾生。

此正明隨順。謂如上彼彼眾生。生起觀智。故云隨順眾生而轉。阿羅漢。翻有三義。一不生。謂不於三界更受生死。二應教。謂自學已滿。堪應教人。三應供。是勝福田。堪銷物供。但以普賢行願之力。令觀行徧法界。於上種類眾生中。念念如此。以彼彼眾生有解會者。自霑如上之益。言平等者。稱性普觀普益也。

何以故。菩薩若能隨順眾生。則為隨順供養諸佛。若於眾生尊重承事。則為尊重承事如來。若令眾生生歡喜者。則令一切如來歡喜。

此徵釋順生所以。意云。若順眾生。則為順佛。若不順生。佛不歡喜。出現品云。佛子。譬如大海。普能印現四天下中一切眾生色身形像。是故共說以為大海。諸佛菩提亦復如是。普現一切眾生心念根性欲樂而無所現。

何以故。諸佛如來以大悲心而為體故。因於眾生而起大悲。因於大悲生菩提心。因菩提心成等正覺。

以下徵釋何以順生諸佛歡喜也。此即標示同體大悲。故出現品云。如來成正覺時。於其身中普見一切眾生成正覺。乃至普見一切眾生入涅槃。皆同一性。以了眾生皆無性故。大悲相續。救護一切。又云。菩薩應知自心念念常有佛成正覺。何以故。諸佛如來不離此心成正覺故。如自心。一切眾生心亦復如是。悉有如來成等正覺。廣大周徧。無有休息。此法說。下喻明。

譬如曠野沙磧之中。有大樹王。若根得水。枝葉華果。悉皆繁茂。

生死懸絕。迴無所依。名為曠野。不生善根。喻以沙磧。佛菩提法。如大樹王。智慧禪定。猶如枝葉。菩薩依學。況之以華。諸佛證此。目之如果。一切眾生以為其根。以大慈悲而為其水。水滋樹根。華果繁茂。悲念萬類。成佛果因。合文備矣。

生死曠野菩提樹王亦復如是。一切眾生而為樹根。諸佛菩薩而為華果。以大悲水饒益眾生。則能成就諸佛菩薩智慧華果。

以下法合。此正合法也。眾生為根者。一切諸佛無不從迷而悟。從妄而真。淨名經云。煩惱即菩提。法句經云。塵勞諸佛種也。

何以故。若諸菩薩以大悲水饒益眾生。則能成就阿耨多羅三藐三菩提故。

此重徵釋者。徵意云。何以益生而成佛菩提。豈不似與他飲食。而自己空口飽耶。無此理也。答意難見。今出經意通云。夫智慧圓滿成就者。必須自他無異。物我同如。見一切眾生皆是我覺心所現。故益他即是益我。生圓我智方圓。故卻牒前語生起義勢云云。更詳連次下兩節經文。斯意轉顯也。阿耨多羅。此云無上。三。此云正。對邪立名。藐。此云等。齊等義故。又言三者。此亦云正。圓滿義故。菩提。此云覺。可貫上四處。應云無上覺。正覺。等覺。正覺。並有所簡。言正覺。簡凡夫外道之邪覺。言等覺。簡二乘聖者偏覺生空。又云正覺者。簡十地聖人分覺二空。無上覺者。如來滿覺也。具上四義。故名阿耨多羅三藐三菩提。

是故菩提屬於眾生。若無眾生。一切菩薩終不能成無上正覺。

反言結成。釋此有二義。一對緣釋。如前文云。因於眾生而起大悲。乃至成正覺等。二觀心釋。有二意。一攀緣妄想即是眾生。妄起即不覺。覺即無妄。合於本覺。名為成佛。二思惟觀察法義。此心念念生起。亦是眾生。必因此心念念推察。方見正理。成智方證菩提。故云爾也。

善男子。汝於此義應如是解。以於眾生心平等故。則能成就圓滿大悲。以大悲心隨眾生故。則能成就供養如來。

此結示令知也。

菩薩如是隨順眾生。虛空界盡。眾生界盡。眾生業盡。眾生煩惱盡。我此隨順無有窮盡。念念相續。無有間斷。身語意業。無有疲厭。

此總結無盡。

庚十普皆回向

復次善男子。言普皆回向者。

回謂回轉。向謂趣向。回已修善。向於三處。謂實際。菩提。及與眾生。

除狹劣障。生廣大善。蓋回向。則一毫之善。皆徧法界故。如回聲入角則遠聞。此牒名。下釋相。

從初禮拜。乃至隨順所有功德。

文乃正明回向眾生。令成菩提。即向菩提。盡於法界。義同實際。所以要此三者。凡是菩薩。必大悲下化。大智上求。而離眾生及菩提相。又向實際者。依於體法。向菩提者。依於相法。向眾生者。依於用法。此明所回善根。下乃正明回向。

皆悉回向盡法界虛空界一切眾生。願令眾生常得安樂。無諸病苦。欲行惡法。皆悉不成。所修善業。皆速成就。關閉一切諸惡趣門。開示人天涅槃正路。

願離苦成善也。願普法界。則橫十方。願令常得。則豎窮三際。

若諸眾生。因其積集諸惡業故。所感一切極重苦果。我皆代受。令彼眾生悉得解脫。究竟成就無上菩提。

發心代苦也。苦由業生。何能代之。略有七意。一起悲意樂。自居凡境。二修諸苦行。為增上緣。三留惑潤生。說法化度。四斷命自墮。脫眾生苦。五由初發心。願處惡趣。六即真大願。與苦同性。七法界為身。自他無異。然約有緣方能代爾。又若定業亦不可代。

菩薩如是所修回向。虛空界盡。眾生界盡。眾生業盡。眾生煩惱盡。我此回向無有窮盡。念念相續。無有間斷。身語意業。無有疲厭。

此總結無盡。

戊三結益令知

善男子。是為菩薩摩訶薩十種大願具足圓滿。若諸菩薩於此大願隨順趣入。則能成熟一切眾生。則能隨順阿耨多羅三藐三菩提。則能成滿普賢菩薩諸行願海。是故善男子。汝於此義。應如是知。

丁二顯經勝德分二。戊一校量聞經德。戊二顯餘眾行德。

今戌一

若有善男子。善女人。

束而言之有九。律儀言之有七。男三者。在家五戒近事男。出家比丘及沙彌也。女四者。在家五戒近事女。出家比丘尼。六法尼。沙彌尼。更兼非受戒男子女人二般。故成九。

以滿十方無量無邊不可說不可說佛剎極微塵數。一切世界上妙七寶。及諸人天最勝安樂。

真諦記說。諸寶類眾。舉勝言七。一金。二銀。三珊瑚。四赤真珠。五末尼珠。六磲磬。七瑪瑙。與阿彌陀經少異。

布施爾所一切世界所有眾生。供養爾所一切世界諸佛菩薩。經爾所佛剎極微塵數劫相續不斷。所得功德。若復有人。聞此願王。一經於耳。所有功德。比前功德。百分不及一。千分不及一。乃至優波尼沙陀分亦不及一。

戌二顯餘眾行德分二：己一總明法行略說。己二偏舉一行廣顯。

今己一

或復有人。以深信心。於此大願受持讀誦。乃至書寫一四句偈。

此總明法行也。總有十種。一書寫。二供養。三轉施。四聽聞。五披讀。六受持。七開示。八諷誦。九思惟。十修習。此十法行。為受持大乘教法入理之方便也。一四句偈者。八字為句。四句為偈。取其最少不過一四句也。又顯義團圓。目之為句。一義圓足。名一四句也。

速能除滅五無間業。所有世間身心等病。種種苦惱。乃至佛剎極微塵數一切惡業。皆得消除。

五無間業。即五逆罪。謂殺父。害母。出佛身血。殺阿羅漢。破和合僧。此五。隨犯一件。皆得逆罪。墮阿鼻獄。經一中劫。受苦無間也。

一切魔軍。夜叉羅剎。若鳩槃荼。若毗舍闍。若部多等。飲血噉肉。諸惡鬼神。皆悉遠離。或時發心。親近守護。

以上略說功德也。魔。梵語具云魔羅。此云殺者。殺修行人智慧命故。魔軍。即天魔也。夜叉。此云猛捷。羅刹。即食血肉之鬼。鳩槃荼。此云守宮神。毗舍闍者。噉精氣鬼也。部多。此云大身鬼。

已二偏舉一行廣顯分三：庚一通明五果。庚二別明淨土果。庚三究竟成佛果。

今庚一

是故若人誦此願者。

舉諷誦一行以例餘。下辨眾德。

行於世間。無有障礙。如空中月。出於雲翳。諸佛菩薩之所稱讚。一切人天皆應禮敬。一切眾生悉應供養。

此明增上果。有增上用故。

此善男子。善得人身。圓滿普賢所有功德。不久當如普賢菩薩。速得成就微妙色身。具三十二大丈夫相。

此明等流果。亦滿普賢功德行故。三十二相者。一足下平如奩底。乃至三十二眉間白毫相等。

若生人天。所在之處。常居勝族。

此明異熟果。乘因感果故。

悉能破壞一切惡趣。悉能遠離一切惡友。悉能制伏一切外道。

此明土用果。有善菩薩用故。

悉能解脫一切煩惱。如師子王。摧伏群獸。堪受一切眾生供養。

此明離繫果。八支聖道。滅煩惱故。煩惱根本：有貪瞋無明慢疑不正見之六。隨煩惱有忿恨乃至散亂等二十。故言一切煩惱。由念行願。正念現前。乃至成佛。永斷諸惡。故云如等。

庚二別明淨土果

又復是人臨命終時。最後剎那。一切諸根悉皆散壞。一切親屬悉皆捨離。一切威勢悉皆退失。輔相大臣。宮城內外。象馬車乘。珍寶伏藏。如是一切無復相隨。

先顯法功能。寶積經說。最後捨壽之際。心極明瞭。一切善惡皆悉現前。畏喜心生。即便往趣也。此即通說一切死相。今誦持人。即不為彼惡相之所逼迫也。

唯此願王不相捨離。於一切時引導其前。一剎那中。即得往生極樂世界。

極樂世界。或名安樂。亦名安養。即阿彌陀佛所依之國土。其國乃地瑩七寶。水通八德。風搖樹響。與天樂以齊鳴。水激清波。將法音而同韻。是以六方調御。金口稱揚。三世如來。致心護念。總斯多義。故以為名也。

到已。即見阿彌陀佛。文殊師利菩薩。普賢菩薩。觀自在菩薩。彌勒菩薩等。此諸菩薩。色相端嚴。功德具足。所共圍繞。其人自見生蓮華中。蒙佛授記。

此乃別明勝果也。由二義故。名阿彌陀。一光明無量。二壽命無量。如阿彌陀經及無量壽經說。文殊師利。此翻妙德。或云妙吉祥。以其降生時。有十種奇瑞。悲華經說。過去寶藏佛時。為無諍念王第三子。名曰帝眾。佛前願取妙淨土。佛言。汝自發願取妙淨土。我今號汝為文殊師利。此表淨土諸吉祥事。其來久矣。今助佛導化。示生舍衛多羅聚落。為梵德婆羅門子。觀自在菩薩者。謂於理事無礙之境。觀達自在。又觀機往救。自在無礙。就悲智解。故以名焉。彌勒。此云慈氏。慈心因緣經說。過去有佛號彌勒。恆以慈心四無量法教化一切。時有婆羅門名一切智光。聞佛說經。便發信心。願持此經。必得成佛。號曰彌勒。即捨家入山。經八千歲。常習慈行。又於過去與釋迦同於弗沙佛所發菩提心。常習慈定。亦名阿逸多。此曰無能勝。為波羅奈國輔相之子。身紫金色。有三十二相。

問。文殊彌勒在此娑婆。今言往彼。又云得見。為同異耶。

答。此有二義。一即體異名同。如說阿彌陀經時。西方亦有無量壽佛等同讚。故知但是名同。體別異也。二是同非異。何以故。如文殊師利。佛道父母。

大權應現。助佛揚化。徧周法界。現種種身。利樂群品。如彌勒為善財說。文殊師利。其行廣大。其願無際。常為無量菩薩之師。普於十方常轉法輪。教化成熟一切眾生。彌勒菩薩。如大經說云。成就一切趣行故。於諸生處而得自在。又言我身普生一切法界。無量所顯。種種相貌。種種威德。充滿法界。為欲成熟往昔同行退失菩提者。示現於此閻浮提中。故知是同非異也。彌陀佛國。多有一生補處。其數甚多。無不皆見。故曰等也。此正明化生。下言利生大用。

得授記已。經於無數百千萬億那由他劫。普於十方不可說不可說世界。以智慧力。隨眾生心而為利益。

此淨土果。亦即土用果。

庚三究竟成佛果

不久當坐菩提道場。降伏魔軍。成等正覺。轉妙法輪。能令佛剎極微塵數世界眾生發菩提心。隨其根性。教化成熟。乃至盡於未來劫海。廣能利益一切眾生。

亦離繫果。究竟離故。然前上為現報果。今此成佛。即後報果。中間諸果皆是生報。唯誦一行。五果具足。三報昭彰。終至菩提。于何不習。

丁三結勸受持

善男子。彼諸眾生。若聞若信此大願王。受持讀誦。廣為人說。所有功德。除佛世尊。餘無知者。

此結前勝德。上猶略歎。今說無盡。

是故汝等聞此願王。莫生疑念。應當諦受。受已能讀。讀已能誦。誦已能持。乃至書寫。廣為人說。

此正明勸持。通十法行。

是諸人等。於一念中。所有行願。皆得成就。所獲福聚。無量無邊。能於煩惱大苦海中。拔濟眾生。令其出離。皆得往生阿彌陀佛極樂世界。

殷勤頌德。意在勸持。然此經一卷。文少義豐。實修行之玄樞。乃華嚴之

幽鍵。功高德遠。何不修持。西域王臣。未有不習。又極樂往生。準十六觀經說。總有九品。隨其品類。隨其行業。方得往生。百餘經論。說修彼因。莫非勤積。方得生彼。今唯誦經一行。一剎那中。便得往生。蒙佛授記。甚為奇妙也。

丙二偈頌分二：丁一標舉。丁二正頌。

今丁一

爾時普賢菩薩摩訶薩。欲重宣此義。普觀十方而說偈言。

重宣者。重頌之意。一為後來不聞。欲令得聞故。二為未悟者。重聞令悟故。三為長行文略。以偈廣之。令易曉會故。四為結句受持。文稍易故。有斯四意。故重頌之。

丁二正頌分三：戊一頌正示普因。戊二頌顯經勝德。戊三頌結勸受持

戊一頌正示普因分二：己一別頌前十門。己二總頌無盡。

己一別頌前十門分八：庚一頌禮敬諸佛。庚二頌稱讚如來。庚三頌廣修供養。庚四頌懺除業障。庚五隨喜功德。庚六頌請轉法輪。庚七頌請佛住世。庚八合頌後三。

今庚一

所有十方世界中。三世一切人師子。我以清淨身語意。一切徧禮盡無餘。

普賢行願威神力。普現一切如來前。一身復現剎塵身。一一徧禮剎塵佛。

初二句頌所禮。次一句頌能禮。次句明周徧。次句辨徧因。後三句別顯禮相。

庚二頌稱讚如來

於一塵中塵數佛。各處菩薩眾會中。無盡法界塵亦然。深信諸佛皆充滿。

各以一切音聲海。普出無盡妙言辭。盡於未來一切劫。讚佛甚深功德海。

二偈中。前偈明所讚。唯深信二字屬能讚因。後偈全顯能讚。於中前半明讚相。次一句明讚時。末後一句正明稱讚。

庚三頌廣修供養。

**以諸最勝妙華鬘。伎樂塗香及傘蓋。如是最勝莊嚴具。我以供養諸如來。
最勝衣服最勝香。末香燒香與燈燭。一一皆如妙高聚。我悉供養諸如來。
我以廣大勝解心。深信一切三世佛。悉以普賢行願力。普徧供養諸如來。**

三偈中。初二偈皆前三句標所供養。後一句正申供養。後偈中。除一切三世佛五字是所供境。末後一句正申供養。餘皆能供因。不頌法供養勝。知長行校量本行。

庚四頌懺除業障

我昔所造諸惡業。皆由無始貪瞋癡。從身語意之所生。一切我今皆懺悔。

初句標所懺業。次句明造業因。次句指造業具。末後句正申懺悔。

庚五頌隨喜功德。

十方一切諸眾生。二乘有學及無學。一切如來與菩薩。所有功德皆隨喜。

前三句餘四字。明所隨喜。後三字。明能隨喜。

庚六頌請轉法輪

十方所有世間燈。最初成就菩提者。我今一切皆勸請。轉於無上妙法輪。

前二句標所勸請。次一句正明勸請。後一句明所請事。

庚七頌請佛住世。

諸佛若欲示涅槃。我悉至誠而勸請。惟願久住剎塵劫。利樂一切諸眾生。

初句標所請。次句正明勸請。下二句出勸請意。

庚八合頌後三分二：辛一合頌三門。辛二頌願生淨土。

辛一合頌三門分三：壬一總標回向。壬二別頌三門。壬三結歸回向。

今壬一

所有禮讚供養佛。請佛住世轉法輪。隨喜懺悔諸善根。回向眾生及佛道。

（佛：福。清續金藏，作佛。杭本注云：藏本供養福，有本作供養佛，非。嘉注：流通本作佛。）

前三句牒前所回善根也。後一句正明回向。略舉二處。實際離相。徧該於二。在無盡中。

壬二別頌三門分三：癸一頌隨如來學。癸二頌恆順眾生。
癸三頌前回向。

今癸一

我隨一切如來學。修習普賢圓滿行。供養過去諸如來。及與現在十方佛。

未來一切天人師。一切意樂皆圓滿。我願普隨三世學。速得成就大菩提。

初句標示。次四句正明隨學。次一句示隨學所因。次一句結成隨學。後一句隨學意。諸佛雖為一切眾生無上大師。然諸眾生中。唯天與人。能發阿耨多羅三藐三菩提心。能修十善業道。能得諸聖果。故號佛為天人師也。

癸二頌恆順眾生。

所有十方一切刹。廣大清淨妙莊嚴。眾會圍繞諸如來。悉在菩提樹王下。

十方所有諸眾生。願離憂患常安樂。獲得甚深正法利。滅除煩惱盡無餘。

初偈標能益之尊。初二句標所依淨刹。下二句能依眾會。後偈顯為生啟願。初句所順生。下三句申願意。以順眾生。即順諸佛。故先舉諸佛。又佛坐樹下。為化眾生。

癸三頌前回向分二：子一別發十願。子二總結大願。

回向與願。大同小異。異者。謂回向要有所回向善根。發願。無善亦可要誓。言大同者。十回向位。大願為體。總願別願。皆回向故。今此即是回向大願。

子一分十：丑一受持願。丑二修行二利願。丑三成熟眾生願。丑四不離願。丑五供養願。丑六利益願。丑七轉法輪願。丑八淨土願。丑九承事願。丑十成正覺願。

今丑一

我為菩提修行時。一切趣中成宿命。常得出家修淨戒。無垢無破無穿漏。

天龍夜叉鳩槃荼。乃至人與非人等。所有一切眾生語。悉以諸音而說法。

受者攝受。持者護持。所受持者。教果行理也。亦名護法願。初句攝菩提。次句持佛法。次二句護佛教。後偈願受法輪也。

丑二修行二利願。

勤修清淨波羅密。恆不忘失菩提心。滅除障垢無有餘。一切妙行皆成就。

於諸惑業及魔境。世間道中得解脫。猶如蓮華不著水。亦如日月不住空。

於中一切妙行皆成就者。此是總句。亦行方便。餘句為別。初句行體。即十波羅密。除蔽清淨。第三句是行業。以十度行。淨十種蔽。助真如觀。淨十種障故。後偈是行相。解脫惑業。即出世間行。解脫魔境及世間道。即世間行也。蓮華日月。雙喻二行。

丑三成熟眾生願。

悉除一切惡道苦。等與一切群生樂。如是經於剎塵劫。十方利益恆無盡。

我常隨順諸眾生。盡於未來一切劫。恆修普賢廣大行。圓滿無上大菩提。

第五句為總。餘句為別。初句離苦。因果皆離。次句得樂。乃至涅槃。第三豎長。第四橫徧。後三句。總結長時所成因果。

丑四不離願。

所有與我同行者。於一切處同集會。身口意業皆同等。一切行願同修學。

所有益我善知識。為我顯示普賢行。常願與我同集會。於我常生歡喜心。

願生處恆不離佛。及諸菩薩得同意行。故亦名心行願。初句為總。同志一乘故。餘句為別。於中先三句自分行同。後偈勝進同。以更成益。復顯示故。

丑五供養願。

願常面見諸如來。及諸佛子眾圍繞。於彼皆興廣大供。盡未來劫無疲厭。

願持諸佛微妙法。光顯一切菩提行。究竟清淨普賢道。盡未來劫常修習。

第三句為總。興廣大供故。大有六種。一心大。無疲厭故。二供具大。財法正行皆具足故。財供攝在總句。正行即第五六句。三福田大。即初二句。四攝功德大。即第七句中。究竟普賢道。是勝功德故。五因大。即第七句中清淨二字。如空清淨。為常無常果之因故。六時大。即第八句。

丑六利益願。

我於一切諸有中。所修福智恆無盡。定慧方便及解脫。獲諸無盡功德藏。

一塵中有塵數剎。一一剎有難思佛。一一佛處眾會中。我見恆演菩提行。

願恆作利生事業。無空過故。亦名三業不空願。前偈修福智等。為不空因。獲無盡藏。是不空果。後偈利益時處。謂徧於時處。求能益法。利眾生故。

丑七轉法輪願。

普盡十方諸剎海。一一毛端三世海。佛海及與國土海。我徧修行經劫海。

一切如來語清淨。一言具眾音聲海。隨諸眾生意樂音。一流佛辯才海。

三世一切諸如來。於彼無盡語言海。恆轉理趣妙法輪。我深智力普能入。

初偈轉法輪處。次一偈。能轉圓音。次二句轉法輪時。第十一一句。所轉法輪。末後一句。能攝方便。

丑八淨土願。

我能深入於未來。盡一切劫為一念。三世所有一切劫。為一念際我皆入。

我於一念見三世。所有一切人師子。亦常入佛境界中。如幻解脫及威力。

願清淨自土。安立正法。及能修行諸眾生。略無淨土之言。以影在後段故。而具淨土七種淨義。初偈即同體淨。以同法性故。令一多互相即入。今文雖辯念劫圓融。意取時中圓融之剎。次半偈明自在淨。第七一句是因淨。又境界者。即是相淨。第八一句攝三淨。謂如幻二字。即是果淨。解脫威力。即受用淨。梵本此句無及威力字。有眷屬字。即住處眾生淨。

丑九承事願。

於一毛端極微中。出現三世莊嚴刹。十方塵刹諸毛端。我皆深入而嚴淨。

所有未來照世燈。成道轉法悟群有。究竟佛事示涅槃。我皆往詣而親近。

願往諸佛土。常見諸佛。恆時敬事。聽受法故。第八句為總。餘皆是別。初偈即承事處。初二句。通是真實義相。互相涉入。如帝網故。就中三世莊嚴。即一切相。淨土體相。有差別故。第三句。即無量相。謂前二相徧十方故。其第四句。辯能知見。第五句。所承事佛。六七二句。即承事時八相故。

丑十成正覺願。

速疾周徧神通力。普門徧入大乘力。智行普修功德力。威神普覆大慈力。

徧淨莊嚴勝福力。無著無依智慧力。定慧方便諸威力。普能積集菩提力。

清淨一切善業力。摧滅一切煩惱力。降伏一切諸魔力。圓滿普賢諸行力。

願與一切眾生。同時皆得無上菩提。恆作佛事故。文有十二力。前六力字。意居句中。前九句。明業用。初一句即自在業。以神通力。普周故。次一句示正覺業。不離一毛端處。而於一切處八相成道。故名普門。次三句即說實諦業。謂說實諦。令物悟故。文中通舉說德及益。第六句即證教化業。說自所證以化物故。次一句。種種說法業。次一句。不斷佛種業。次一句。法輪復住業。後三句。結因成果。由內伏煩惱。外降諸魔。普賢行圓。故成菩提。

子二總結大願分二：丑一總結十願。丑二結歸二聖。

今丑一

普能嚴淨諸刹海。解脫一切眾生海。善能分別諸法海。能甚深入智慧海。

普能清淨諸行海。圓滿一切諸願海。親近供養諸佛海。修行無倦經劫海。

三世一切諸如來。最勝菩提諸行願。我皆供養圓滿修。以普賢行悟菩提。

前八海。結前九願。謂一淨土。二成熟眾生。三轉法輪。四受持。五修行二利。六利益。由願圓故。七承事供養二願。八即不離願。後一偈。成正覺願。以三世因圓。正覺果滿故。

丑二結歸二聖分二：寅一偏同普賢。寅二雙同二聖。

今寅一

一切如來有長子。彼名號曰普賢尊。我今回向諸善根。願諸智行悉同彼。
願身口意恆清淨。諸行剎土亦復然。如是智慧號普賢。願我與彼皆同等。

所以同者。普賢行故。稱法界故。言長子者。最尊勝故。同等云者。無盡願行。如法界量也。

寅二雙同二聖。

我為徧淨普賢行。文殊師利諸大願。滿彼事業盡無餘。未來際劫恆無倦。
我所修行無有量。獲得無量諸功德。安住無量諸行中。了達一切神通力。
文殊師利勇猛智。普賢慧行亦復然。我今回向諸善根。隨彼一切常修學。

文殊表解。解發願故。普賢表行。解起行故。故願與行分屬二聖。理實皆通。又表理智一相契合。行願相扶。所以雙同。

壬三結歸回向

三世諸佛所稱歎。如是最勝諸大願。我今回向諸善根。為得普賢殊勝行。

上來諸願。皆屬回向。彌顯三段皆屬回向。

辛二頌願生淨土

願我臨欲命終時。盡除一切諸障礙。面見彼佛阿彌陀。即得往生安樂剎。
我既往生彼國已。現前成就此大願。一切圓滿盡無餘。利樂一切眾生界。
彼佛眾會咸清淨。我時於勝蓮華生。親覩如來無量光。現前授我菩提記。
蒙彼如來授記已。化身無數百俱胝。智力廣大徧十方。普利一切眾生界。

全同長行顯經勝德轉生之益。但此令起願也。不生華藏。而生極樂。略有四意。一有緣故。彌陀願重。偏接娑婆界人。二欲使眾生歸憑情一故。但聞十方皆妙。此彼融通。初心茫茫。無所依託。故方便引之。三不離華藏故。極樂

去此但有十萬億佛土。華藏中所有佛刹皆微塵數。故不離也。四即本師故。入法界品偈讚云。或有見佛無量壽。觀自在等共圍繞。乃至賢首阿閼等。皆讚本尊遮那之德也。

已二總頌無盡。

乃至虛空世界盡。眾生及業煩惱盡。如是一切無盡時。我願究竟恆無盡。

戊二頌顯經勝德分二：已一頌校量聞經益。已二通頌顯眾行益。

今已一

十方所有無邊刹。莊嚴眾寶供如來。最勝安樂施天人。經一切刹微塵劫。若人於此勝願王。一經於耳能生信。求勝菩提心渴仰。獲勝功德過於彼。

已二通頌顯眾行益分二：庚一通頌五果。庚二頌究竟果。

今庚一

即常遠離惡知識。永離一切諸惡道。速見如來無量光。具此普賢最勝願。此人善得勝壽命。此人善來人中生。此人不久當成就。如彼普賢菩薩行。往昔由無智慧力。所造極惡五無間。誦此普賢大願王。一念速疾皆消滅。族姓種類及容色。相好智慧咸圓滿。諸魔外道不能摧。堪為三界所應供。

初偈增上果。次偈等流果。次偈離繫果。次半偈異熟果。後半偈士用果。惡知識能壞身心。故常當遠離。無量光。即阿彌陀佛。盡一報身。修習勝行。不虛度時。名勝壽命。長行別明淨土果。已在前願中頌竟。

庚二頌究竟果

速詣菩提大樹王。坐已降伏諸魔眾。成等正覺轉法輪。普利一切諸含識。

戊三頌結勸受持分三：已一結前諸行。已二重顯勝益。已三結成回向。

今已一

若人於此普賢願。讀誦受持及演說。

已二重顯勝益

果報唯佛能證知。決定獲勝菩提道。若人誦此普賢願。我說少分之善根。

一念一切悉圓滿。成就眾生清淨願。

已三結成回向

我此普賢殊勝行。無邊勝福皆回向。普願沈溺諸眾生。速往無量光佛刹。

乙二結說讚善

爾時普賢菩薩摩訶薩。於如來前。說此普賢廣大願王清淨偈已。善財童子踴躍無量。一切菩薩皆大歡喜。如來讚言。善哉善哉。

會初世尊入師子頻申三昧。便令逝多林忽然廣博。現種種莊嚴之事。普賢開發。文殊讚述。大眾頓證後。文殊出至福城東。教示善財。展轉求道。乃至品末。佛無自說之處。此如來讚言。乃是義生。古德共立。令眾頓證也。

甲三流通分

爾時世尊。與諸聖者菩薩摩訶薩。演說如是不可思議解脫境界勝法門時。

此是所說法也。此云佛說。亦是義生。有二意。一此之一會。佛為會主。雖諸善友。以總該別。亦屬佛說。二徧該九會。以皆不起菩提樹王。徧一切處。一時頓說。

文殊師利菩薩而為上首。諸大菩薩。及所成熟六千比丘。彌勒菩薩而為上首。賢劫一切諸大菩薩。無垢普賢菩薩而為上首。一生補處。住灌頂位。諸大菩薩。及餘十方種種世界。普來集會。一切刹海。極微塵數。諸菩薩摩訶薩眾。

下言時眾受持也。此列菩薩眾有四類。前二類多在此會。後二類通於九會。比丘。新云苾芻。唐言具淨。苾芻草有五德。以況佛弟子有五德也。五德者。一體性柔軟。二引蔓傍布。三香氣遠騰。四觸身安樂。五不背日光。復有五義。

一曰怖魔。二曰乞士。三曰淨持戒。四曰淨命。五曰破惡。六千比丘。舍利弗徒眾。勸令歸依文殊者。此三千大千世界初欲成時。有大水聚。淨居天子觀此大水。見有千莖諸妙蓮華。各有千葉。金色金光。知有賢人一千。同劫成佛。故名賢劫。如大悲經說。唯有人中一徧受生。名為一生。當紹前佛之位。名為補處。住灌頂位。菩薩十地滿心。入佛境界。具足十力。墮在佛數也。亦名受職位。

大智舍利弗。摩訶目犍連等而為上首。諸大聲聞。

此列聲聞眾。唯局此會。舍利弗。亦曰舍利子。即鷲鷲子。蓋從母以呼也。姓拘栗氏。號優波提舍。即王城提舍論師之子。年纔八歲。名振四方。與大目連少而為友。事山闍耶外道。知不究竟。將期明脫。後遇馬勝。聞法得初果。與其徒眾二百五十人投佛出家。半月後。得無學果。摩訶目犍連。新云摩訶沒特伽羅子。目犍連姓。翻為大採菽氏。又云菉豆子。名拘律陀。王舍拘哩伽邑人。大婆羅門種。後因鷲子說偈悟道。詣佛出家。七日後得無學果。聲聞言大者。有六義。一智大。盡無生故。二斷大。見修盡故。三相大。佛威儀故。四利大。世應供故。五用大。具通明故。六記大。當作佛故。

並諸人天一切世主。天龍夜叉。乾闥婆。阿修羅。迦樓羅。緊那羅。摩睺羅伽。人非人等。一切大眾。

此列雜類眾。天龍等者。總舉八部眾也。一天者。有四。一名天。如世國王名為天子。二生天。下從四天王天。上至非想非非想天中有情。三淨天。但於人中得聖果者。名為淨天。有自在義故。四生淨天。謂二十八天中諸聖人是也。今言天者。多取第二生天也。二龍有四種。一天龍。持天宮殿。不教墮落者。二人龍。人間興雲致雨者。三地龍。能持山河大地。四王龍。守護王之庫藏等者。三夜叉者。新云藥叉。此云輕捷鬼。又翻暴惡神。亦名勇健神。雌者地行。雄者名有翅能飛空。居下天。守天城門也。四乾闥婆者。正云健闥𑖀。此云尋香行。亦云食香神。為天奏樂。五阿修羅。新云阿素落。此云非天。謂無天實德也。六迦樓羅。此云金翅鳥。正云羯路荼。此云妙翅鳥。身有金銀琉璃頗胝迦四色。翅羽嚴麗。七緊那羅。正云緊捺洛。此云歌神。體是畜生。形狀

似人。面貌端正。頭上有一角。人見生疑。亦名疑人也。八摩睺羅伽。正云莫呼洛迦。此云大腹。即蟒蛇蝦蟇之類也。

問。此等何緣得至佛會。

答。由佛慈悲。廣為引他。有靈之類。皆悉奔波。希法雨以潤萌芽。冀智藥而除眾苦。如歸慈父。若趣醫王。但由平等慈悲。恩霑動植者也。

聞佛所說。皆大歡喜。信受奉行。

此總顯受持。通則諸眾也。然此流通。偏通第九。若通九會。於理無違。歡喜奉行有三種義。一說者清淨。不為取著名利所染故。二所說清淨。以如實知法體故。三者得果清淨。即說益也。

普賢行願品別行疏鈔擷竟